

20 kadeta položilo zakletvu u SIPA-i

Stanić: Budite na usluzi svakom građaninu BiH

Završili četveromjesečnu osnovnu policijsku obuku za stjecanje čina mlađi inspektor

„Ja sam policijski službenik države BiH“, riječi su kojima je 20 mlađih inspektora, kadeta jučer u sjedištu Državne agencije za istrage i zaštitu (SIPA) u Istočnom Sarajevu položilo zakletvu na časno i odgovorno služenje državi BiH.

Simbolično, na početku nove 2016. godine zvanično je počeo njihov rad u najznačajnijoj policijskoj agenciji u BiH. Zakletvu su položili pred Draganom Mektićem, ministrom sigurnosti BiH, koji im je poručio da od njih očekuje profesionalan rad, poštovanost te rad u skladu s izazovima i standardima koje zahtijeva ova odgovorna profesija.

Čast i ugled

- Biti policijski službenik je čast, ali i obaveza. Policijski službenici moraju uvijek, na svakom mjestu, biti primjer. Ovo je znak da se SIPA podmlađuje, jača i priprema za sve izazove koji se nalaze pred njom. Izazovi su veliki, ali su velika i očekivanja od SIPA-e kao ključne policijske agencije u borbi protiv najtežih oblika organiziranog kriminala i terorizma – kazao je ministar u obraćanju prisutnima.

Ministar je mladim in-



S jučerašnjeg polaganja zakletve: Velika čast, ali i obaveza

spektorima poručio da ne dozvole da bilo šta ukalja njihovu čast, da naruši ugled Agencije u kojoj rade i države kojoj služe.

- Vi ste od danas ogledalo ove agencije. Budite dosljedni u primjeni zakona, hrabri u suprotstavljanju kriminalu i u izvršavanju policijskih poslova - poručio je Mektić.

Direktor SIPA-e Perica Stanić također je naglasio da je policijski poziv velika čast, ali i velika obaveza. Kadetima je kazao da su od sada dio ozbiljnog sistema te da se od njih očekuje da svoj po-

sao obavljaju zakonito, profesionalno i časno, i da budu u službi građana.

- Od vas očekujem da uvijek vodite računa o svom ponašanju i tako čuvate svoj, ali i ugled SIPA-e. Da svoj posao obavljate zakonito, profesionalno i časno te da budete u službi svakog građanina BiH - dodao je Stanić.

Temeljan pristup

Najbolji kadet generacije Nikola Čevriz rekao je da su pred njima velike obaveze i izazovi.

- Samo temeljan i ozbi-

ljan pristup može biti garant uspješnog i kvalitetnog obavljanja zadataka – rekao je Čevriz.

Kadeti su nakon selekcije, u okviru konkursne procedure za prijem u SIPA-u, završili četveromjesečnu osnovnu policijsku obuku za stjecanje čina mlađi inspektor, koju je provela Agencija za školovanje i stručno usavršavanje kadrova. Ceremoniji su prisustvovali i načelnici organizacionih jedinica SIPA-e i direktori policijskih agencija u BiH.

E. TRAKO